

Bouônjour tout l'monde, ch'est mé, Peter Germain tchi vos pâle acouo eune fais.

La s'maine pâssée j'fus en Angliétèrre pouor un entèrrement, ch'tait pouor un maît' d'êcole qué j'avais travailli quand j'tais en Angliétèrre à eune êcole au mitan d'la campagne en Shropshire, ch'tait eune êcole éyou qu'les étudgiants restaient tout l'temps, matin au sé. À la fin du tèrme i' r'touônnaient siez lus pâthents pouor les vacances. Ch'tait ma preunmié êcole, j'tais si content à chute pliaiche. Gordon (l'anmîn tch'avait mouothi) m'avait souongni. Tchi magnifique c'ménchement pouor ma vie coumme un maît' d'êcole!

J'prîns l'avion dé bouonne heuthe pouor Birmingham. Chu matin i' tchiyait d'la plyie avèrse!! Et coumme j'ai diffitchulté à marchi, j'avais bésoun dé tchiqu'un pouor m' emmener dans eune tchaise. Tu pâles qué j'tais mouoilli. Quand j'arrivis à Birmingham, jé m'lève de man siège, oubliant que j'n'avais pon rempliaichi ma cheintuthe entouor mes braies auprès tch'i' m'avaient prîns à la sétchuthité. Et i'tchiyîtent bas!!!

Mé v'là d'but avec mes braies à bas!! l'm'boulîtent jusqu'à ma vaituthe qué j'avais loué. Auprès qu'j'avais conduit pouor deux heuthe, j'arrivis à l'Églyise. Ch'tait bouôn dé cachi à grand' vîtesse! Pus qué quarante milles par heuthe! Pouor un change!! Et là, j'rencontris d's' étudgiants qué j'n'avais pon veu en chînquante ans !! En pâlant, i' m'ramémouaithîtent man temps coumme lus maître. Et l'influence qué j'avais fait pouor lus vie! J'avais oublié, mais pas ieux. l'fûtent si contents tch'il' avaient l'opportunité dé m'dithe un grand mèrcie! J'fus ravi. L'année pâssée j'fus à Londres pouor rencontrer mes vièrs étudgiants dé Victoria College d'ichîn en Jèrri (j'tais maître ilà pouor trente-trais ans).

Duthant un r'pas dans un restaurant, driéthe mé, y'avait un bouton avec les mots "Push for Champagne". l'un d'mes garçons mé d'mandit d'pousser chu bouton! Lé sommelier arrive et donne la carte à m'n anmîn. i' c'mandit eune boutelle dé grand prix! Trop pouor mentionner ichîn!! Quand la boutelle arrivit, i'm' dit "chennechîn est pouor té, car tandis qué j'tais un étudgiant au Collège, plusieurs des maît's m'avaient dit, qué jé n'tais pon bouôn pour rein". l' vînt m'vaie pouor l'avis. J'li dis, "si tu veurs tchiquechouse, i' faut l'trouver. Comme chennechîn, i' n'êcoutit pon l's aut's maîtres et travaillit dû, enfin, i' gagnit eune pliaiche à l'univèrsité dé Cambridge, pouor en finni, i' fut à travailli à Londres. Achteu il est un millionnaithe. Nou n'sait jamais, quand tu dis tchiquechouse, deux'trais mots d'avis, coumment l's affaithes peuvent changi.

Y'a deux s'maines qu'man p'tit frêthe 'Tosh' ou David, avec sa bouonnefemme Heather, m'invitit à eune rêunion pouor célébrer plusieurs choses! San septante-chîntchième annivèrsaithe, et l'annivèrsaithe à sa bouonne femme Heather (j'sis trop un moussieu pouor mentionner s'n âge!) et lé chînquantchième annivèrsaithe dé lus mathiage, et chînquante ans tch'il' avaient c'menchi lus tèrrain dé camping. Tu pâles qué j'eûnmes un tas d'fanne. J'rencontrîmes d's anmîns du temps pâssé. J'fus ravi qué quâsi tout' l' monde lus mîtent à danser! J'tais assis à côté d'la fil'ye Le Gresley, tu sais bein, Jaquie Vaûtchi, eune fil'ye dé St Ouën tchi vînt d'meuther ichîn à Rozé!!! Avec san bouônhomme David Vaûtchi, j'pâlîmes en Jèrriais, ch'tait un mio difficile dé comprendre un gris ventre!!!!

Achteu qu'l'Automne arrive, j'trouve qué j'ai un tas d'frits dans mes pommièrs, et d'nouaix sus mes 'Nogues' (nouoyièrs). Tout l'monde sont à dithe qu'il' ont un tas d'pommes. l' s'en

va être eune bouonne année pouor lé Nièr Beurre!! J'aime bein chennechîn sus man pain au matîn. Et ma sauce dé pommes avec du lard rôti... et n'oubliez pon du bouôn cidre!

La s'maine pâsée j'fus invité à eune bordée d'fanne à la Salle Pârrouaïssale dé St Ouën, y'avait d'la chânt'tie et d's èrcitâtions, par Brian Vibert et Audrey Lucas, et j'tais si content d'écouter Tama Coxshall (un janne gâs tch'est à apprendre lé jèrriais) il avait chouaïsi eune pièche écrite par ma vaîsinne du temps pâssé Amelia Pèrhard.

Pouor en finni, y'a un mais, à trais heuthes au matîn, j'fus rêvillyi par eune alarme. J'tais sans l'électricité. D'l'ieau d'la mansarde avait traversé trais étages. Tu pâles qué ch'tait un pêque-mêle: les tapis, lé fond d' l'aithe, pliein dg'ieau. Et les muthâles, partout, i' fut oblyigi dé pelleter tout, et l'rempliaichi, haler l'papi sus les muthâles. Dgieu mèrcie i' sont finni. Tout est propre et sé. Mèrcie à l'assurance.

Et bein ch'est tout pouor aniet. À bétôt, à la préchaîne.